

Flerschemerisch iss schee

Jetz iss de Hessedaach erum unn schunn giehts weider meddem Flerschemer Summerfest. Unn dess hott e mords Programm.

Gehderr mol hie?, habb isch de Schorsch gefroochd, wie ischen beim Oikaafe getroffe habb.

Doo gibbder ze Antwort: Ei nodierlich, unn ihr?

No ja, saach isch, wie dess immer su iss. Omm Sunndaach um Vier wollde merr uff jeden Fall zu de Ulrike Neradt mett ihm Rhoigauer Gebabbel unn mett ihrne Musiker, awwer grad doo habb isch enn onnern Termin.

Saachen ab, seet de Schorsch.

Isch habb de Kobb geschiddeld. Dess gieht nitt, weil isch muss mett moim Kummbeer Alex nooch Darmstadt. Mir hadde uns beworwe um enn Preis ferr unser Flerschemer Werrderbuch unn obwohl merr nitt de ersde Preis gemachd hawwe, sinn merr oigelade worrn, bei de Preisverleihung omm Sunndaach debei ze soi unn mett dene Veroo-stallder ze redde.

Was issen dess ferrn Preis unn vunn wem issen der?, frächt de Schorsch.

Isch druff: Der Preis heeßt Spirwes, Preis ferr Maulkunst unn Lebensart, unn der werdd vergewwe vumm Verein Darmstädter Heiner unn vumm Dadderich-Verein. No ja, doo werrn merr verschiedene Mundarte heern unn aach e paar Leit kennelerne, mett dene merr uns späder emol ausdusche kenne.

De Schorsch hott merr uff die Schulter geklobbd. Dess heert sich gut oo, Honnes, was nitt iss kann joo noch werrn, den Preis duts doch bestimmt aach im nächsde Jahr gewwe, doo machderr halt widder mett.

Ei nodierlich, saach isch.

Doo frächt de Schorsch: Awwer saach emol, du haddst merr doch verzählt, dass du ebbes in de Kuldurscheier mache willst?

Dess werdd aach gemacht, omm neunde September noochmiddaachs um Drei, unn doo isses aach su, dass dess Flerschemer Kulduromt vorgeschlaache hott, verschiedene Mundarte vorzetraache, unn doo werdd e Fraa aus Massenem kumme, enn Monn aus de Wetterau unn aach e Fraa außem Rhoigau, die mett de Ulrike Neradt im sellwe Mundartverein zesomme iss. Der Noochmiddaach werdd bestimmt gut.

Ach Honnes, seet de Schorsch, du häddst schunn vor Johnn su enn Verein in Flerschem uffmache solle unner dem Motto: Flerschemerisch iss schee.

Isch habb droo gedenkt, Schorsch, saach isch, unn dess waaßde aach. Awwer du waaßt aach, dass isch vill onnern Sache ze mache habb. Isch habb ze due ferr de Verein ferr Flerschem, doo dut sich bald ebbes vor dene Gerichte, außerdem schreib isch grad widder e Buch, dissmol iwwer die Flerschemer Fischer um dess Jahr fuffzehnhundert erum – unn dess Schreiwe unn dess Noochgugge in Bischer unn Archive kost Zeit. Isch habb halt aach immer gedenkt, enn onnern deet su ebbes mache, awwer isch glaab, die Zeit ferr Mundarte kimmt erst noch, unn donn werdd e Fraa odder enn Monn enn Flerschemer Mundartverein uffmache. Weil mir, de Alex unn isch, mir hawwe mett dem Werrderbuch erst oomol e bissi was Flerschemerisches festgehalte unn villeischd iss die Arwed deferr nitt gons umsunnst gewese.

Eiern Honnes